

दिनांक : 25.03.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- आतूणी एशिया मांय उपजा हालात रा बारा मांय चर्चा सारू रक्षा मंत्री राजनाथ सिंह री सदारत मांय संसद भवन परिसर मांय सगळी सियासी पार्टिया री मीटिंगं
- मुख्यमंत्री भजनलाल शर्मा आज नई दिल्ली मांय प्रधानमंत्री नरेन्द्र मोदी अर दूजा मंत्रियां सागे मुलाकात कर र प्रदेश रा विकास रा बारा मांय चर्चा कीनीं
- राज्य मांय एक अप्रैल ऊँ शुरु व्हेवण वाळा नुवा शैक्षणिक सत्र ऊँ पैली आज सगळी सरकारी स्कूलां मांय पीटीएम राख्यी ज्यीं
- आकाशवाणी काल ऊँ संवारे रा प्रसारण री शुरुआत राष्ट्रगीत वंदे मातरम रा पूरा संस्करण सागे करेलां

आतूणी एशिया मांय उपजा हालात रा मुद्दा माथे सरकार सगळी पार्टिया री मीटिंग बुलायी हैं रक्षा मंत्री राजनाथ सिंह री सदारत मांय चाल रही मीटिंग मांय केंद्रीय गृह मंत्री अमित शाह, विदेश मंत्री एस. जयशंकर, पेट्रोलियम मंत्री हरदीप सिंह पुरी अर संसदीय कार्य मंत्री किरन रिजिजू, जनता दल यूनाईटेड रा कार्यकारी अध्यक्ष संजय झा अर राजीव रंजन (ललन) सिंह समेत केई नेता मौजूद हैं कांग्रेस रा नेता मुकुल वासनिक अर तारिक अनवर, सीपीआई (एम) रा सांसद जॉन ब्रिटान, समाजवादी पार्टी रा सांसद धर्मेन्द्र यादव अर विपक्ष रा केई नेता ई मीटिंग मांय मौजूद हैं इण ऊँ पैली संसद मांय प्रधानमंत्री नरेन्द्र मोदी कह्यो हो के सरकार ईरान-इजराइल-अमरीका री लडाई रो भारत माथे असर कम करण सारू ईंधन, आपूर्ति श्रृंखला अर खाद्य समेत न्यारा-न्यारा मुद्दां माथे कार्यनीतियां विकसित करण सारू सात समूह बनाया हैं

केन्द्र सरकार कह्यो है के देश मांय 25 करोड़ टन काचो तेल साफ करण रो बूतो हैं आतूणी एशिया मांय उपजा हालात रा बारा मांय पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा आज नई दिल्ली मांय खबरनवीसां सागे बातचीत करता थकां बतायो के आखा देश मांय पेट्रोलियम उत्पादां रा दाम नी बधायी ज्या हैं

सुजाता शर्मा पीएनजी विस्तार रा बारा मांय कह्यो के सरकार ई बारा मांय ध्यान दे रही है अर काल ई बारा मांय गजट अधिसूचना जारी करी ज्यीं वे कह्यो के लारला 25 दिन मांय पाईप रे जरिये रसोई गैस लेवण रा करीब अढाई लाख नुवा कनेक्शन दिया ज्यां पेट्रोलियम अर प्राकृतिक गैस मंत्रालय री संयुक्त सचिव बतायो के ई सागे ई करीब दो लाख बीस हजार ग्राहक टंकी रे जरिये गैस लेवण री बजाए पाईप ऊँ गैस रा कनेक्शन लीना हैं

मुख्यमंत्री भजनलाल शर्मा आज संसद भवन मांय प्रधानमंत्री नरेन्द्र मोदी सागे शिष्टाचार भेंट कीनीं ई दौरान दोन्यू नेता विकसित राजस्थान बणावण सारू चलाई जा रही जनता रा भला री योजनावां अर विकास रा कामां रा बारा मांय विगतवार चर्चा कीनीं मुख्यमंत्री शहरी विकास मंत्री मनोहर लाल खट्टर सागे ई मुलाकात कर र प्रदेश मांय शहरी हलकां रा विकास ऊँ जुड़ी परियोजनावां रा बारा मांय चर्चा कीनीं आज दोपहर श्री शर्मा नागर विमानन मंत्री के राममोहन नायडू ऊँ ई भेंट कीनीं वे जयपुर हवाई अड्डा रो नुवो टर्मिनल, भरतपुर, डीग, सीकर अर झुंझुनूं मांय नुवा हवाई अड्डा बणावण सागे ई भानपुर अर बांसवाड़ा सरीखी खास ठौड़ा ने ई हवाई सम्पर्क ऊँ जोड़बा रा बारा मांय चर्चा कीनीं

राज्यपाल अर विश्वविद्यालयां रा कुलाधिपति हरिभाऊ बागडे विद्यार्थियां ऊँ देश मांय पत्रकारिता रा इतिहास अर माथो ऊँचो करण वाळी ज्ञान परंपरा ऊँ जुडबा सारु कह्यो हैं वे आज जयपुर मांय हरिदेव जोशी पत्रकारिता अर जनसंचार विश्वविद्यालय रा दीक्षांत समारोह मांय बोल रहया हाँ कुलाधिपति कह्यो के समाचार सागे विचार—संस्कृति रो ई विकास व्हेवणो चाहिजे अर पत्रकारिता रा मूल्य बणाया राखणो ज़रूरी हैं कार्यक्रम मांय विधानसभा अध्यक्ष वासुदेव देवनानी विद्यार्थियां ऊँ सब ऊँ पैली री बजाए सब ऊँ सही खबर देवण बाबत् कह्यो ई मौके उपमुख्यमंत्री अर उच्च शिक्षा मंत्री डॉ. प्रेमचंद बैरवा निपख तौर ऊँ सत्यनिष्ठा सागे पत्रकारिता करण बाबत् कह्यो जळसा मांय साल 2024 अर 2025 मांय पास व्ह्या 271 विद्यार्थियां ने उपाधियां दीरीजी अर 12 विद्यार्थियां ने सोना रा तमगा दे र नवाजी ज्यां

प्रदेश मांय एक अप्रैल ऊँ सरु व्हेवण वाळा नुवा शिक्षा सत्र ऊँ पैली आज सगळी सरकारी स्कूलां मांय मेगा पीटीएम राख्थी ज्यां ई दौरान मोटी तादाद मांय विद्यार्थियां रा मायत स्कूलां मांय जा र बच्चां री शैक्षणिक प्रगति री जाणकारी हासिल कीनीं

स्कूलां मांय न्यारा—न्यारा कार्यक्रम राख्थी ज्या अर नुवो दाखिलो लेवण वाळा बच्चां रो रोली—कुमकुम लगा र स्वागत करी ज्या अर वां ने माळा पहरायी ज्यां केई ठौडां बच्चां ने किताबां भेंट करी ज्यां ई मौके शिक्षा अर पंचायतीराज मंत्री मदन दिलावर ई न्यारी—न्यारी स्कूलां मांय जा र बच्चां रा मां—बाप सागे बातचीत कीनी अर स्कूलां री व्यवस्थावां रो जायजो लीनीं

देश मांय कोरोना री बीमारी पाछे करीब एक हजार 24 नुवी रेलगाडियां चलाई ज्यां रेल मंत्री अश्विनी वैष्णव आज लोकसभा मांय पूरक सवालां रा जवाब मांय आ जाणकारी दीनीं श्री वैष्णव सदन ने बतायो के मौजूदा रेलगाडियां मांय चार हजार 651 नुवा डिब्बा जोड़ी ज्यां रेल मंत्री बतायो के रेलवे मुसाफिरां सारु बिना अडचन टिकट लेवणो तैय करण बाबत् दगाबाजी रोकण री जुगत लगायी हैं

रेलमंत्री कह्यो के हिफाजत माथे खास ध्यान देवण रे कारण रेल हादसां री तादाद मांय कमी आयी हैं

संस्कृति मंत्रालय डिजिटल प्लेटफॉर्म रे ज़रिये आखी दुनिया मांय भारत री समृद्ध अर विविध संगीत परम्परा रो प्रचार करण रा मकसद ऊँ आज यू—ट्यूब कंपनी सागे करार कीनीं ई मौके संस्कृति मंत्री गजेन्द्र सिंह शेखावत कह्यो के देश री सांस्कृतिक विरासत ने बचावण अर दुनिया भर मांय पारम्परिक लोक अर जनजातीय संगीत ने बधावो देवण री दिशा मांय ओ खास कदम हैं श्री शेखावत विषय सामग्री बणावण अर वां रा प्रसार मांय यू—ट्यूब री सराहवणा कीनीं

आकाशवाणी काल ऊँ संवारे रा प्रसारण री सरुआत राष्ट्रगीत वंदे मातरम रा पूरा संस्करण ऊँ करेलां आजादी पाछे ऊँ ई आकाशवाणी रा टेशन संवारे रा प्रसारण की सरुआत राष्ट्रगीत री धुन ऊँ करे हैं सूचना अर प्रसारण मंत्रालय रे मुजब संगीत री विविधता रो दरसाव करण सारु छह श्लोक वाळा वंदे मातरम् रा क्षेत्रीय संस्करण ई रिकॉर्ड कर्या जा रहया हैं

प्रदेश मांय लारला दिनां व्ही बिरखा रा असर ऊँ हाल ई घणखर हलकां मांय पारो घणो नी चढ्यो हैं राज्य रा अधिकतर जिलां मांय दिन री बगत तापमान 30 ऊँ 35 जद के रात री बगत तापमान 20 डिग्री सेल्सियस रे आरे—सारे दर्ज कर्यो जा रह्यो हैं प्रदेश मांय आवता दो दिन मौसम सूखो रेहवेला, हालांकि काल अर 27 मार्च ने सरहदी हलकां अर शेखावाटी हलका मांय कठे—कठे बादळां री गाज सागे हल्की बारिश व्हेवण रा आसार हैं 28 ऊँ 30 मार्च बीचे कठे—कठे बादळां री गाज सागे तेज आंधी—बारिश व्हेवण री संभावना हैं मौसम केंद्र जयपुर 28 मार्च ने जोधपुर अर बीकानेर संभाग सागे शेखावाटी हलका मांय आंधी—बारिश रा आसार जताया हैं 29 अर 30 मार्च ने केई जिलां मांय तेज आंधी सागे बरसात री संभावना हैं मौसम केंद्रकृषि मंडियां अर धान मंडियां मांय खुला मांय राख्योडां अनाज, पाक्योड़ी साखां अर जिंसां ने ढक र राखण री राय दीनी हैं

वेयर हाउसिंग विकास अर नियामक प्राधिकरण री ओर ऊँ आज जोधपुर मांय राज्य स्तर री कार्यशाला राख्यी ज्यीं ईँ मौके प्राधिकरण रा सदस्य शांति लाल जैन बतायो के किसान उपज ने पंजीकृत गोदामां मांय राख र बैंक ऊँ 75 फीसदी ताई कर्ज ले सके हैं इण ऊँ वां ने साखा री कटाई री बगत कम दाम माथे उपज बेचण री मजबूरी ऊँ छुटकारो मिलेलां किसान इलेक्ट्रॉनिक रसीद रे जरिये बिना और गारंटी कर्ज ले सके हैं कार्यशाला मांय जोधपुर संभाग मांय जीरा, सरसों अर मूंगफली सरीखी साखां ने हिफाजत सागे भेळी करण री संभावनावां रा बारा मांय चर्चा करी ज्यीं

झुंझुनू मांय नुवा बस स्टैंड हलका मांय महिलावां रा सुबीता सारू पिक सुविधा घर सरू करी ज्यो हैं विधायक राजेंद्र भांबू आज इण रो उद्घाटन कीनों ईँ मौके भांबू कह्यो के राज्य सरकार महिलावां रा मान अर वां री हिफाजत सारू लगातार काम कर रही हैं नगर परिषद कानी ऊँ बनायी ज्यां ईँ पिक टॉयलेट मांय साफ-सफाई अर हिफाजत रा खास प्रबन्ध करी ज्यो हैं

लोकसभा आज ध्वनिमत ऊँ वित्त विधेयक-2026 पास कर दीनों ईँ बिल मांय माली साल 2026-2027 सारू केंद्र सरकार रा माली प्रस्तावां ने लागू करण रो प्रावधान करी ज्यो हैं सदन चर्चा पाछे प्रस्तावित बदलावां ने मंजूरी दे दीनीं चर्चा रो जवाब देता थकां वित्त मंत्री निर्मला सीतारमण कह्यो के सरकार एम.एस.एम.ई. इकाइयां, किसानां अर सहकारी समितियां ने मजबूत बणा रही हैं सीतारमण बतायो के अ हलका नौकरी-धंधा रा मौका बधावण, उत्पादन अर देश रा पूरा विकास री बुनियाद हैं वित्त मंत्री कह्यो के प्रस्तावित वित्त विधेयक मांय खास तौर ऊँ मझला तबका रो ध्यान राख्यी ज्यो है अर सरकार जिन्दगी बचावण वाळी सत्रह खास दवाइयां माथे बुनियादी कस्टम ड्यूटी ऊँ छूट देवण रो फैसलो कीनो हैं

प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा खास कार्यक्रम "मन की बात" मांय 29 मार्च-दीतवार ने विचार बतावेलां आ ईँ कार्यक्रम री 132वीं कड़ी व्हेलां ईँ सारू आप ईँ मुफ्त नम्बर 1800-11-7800 माथे 27 मार्च ताई राय दे सको हों विचार नरेन्द्र मोदी एप अर माय जीओवी ओपन फोरम रे ज़रिए ईँ भेजा जा सके हैं